



Synfocity = 890

mail us at : mzsynfo@gmail.com; mizoramsynod@gmail.com - Phone - 2314648

May 25, 2023

☐ Missionary Retreat tluang taka neih a ni

Mizoram Presbyterian Kohhran Central Region Missionary Retreat chu May 18-21, 2023 chung khan Chaltlang Kohhran Biak Inah neih a ni a, Thupui 'Krista hmangaihna chuan min tir lui a ni' tih a ni a, Speaker Rev. Dr. K. Lallawmzuala, Executive Secretary i/c Mission-in tum thum a sawi a, Synod Moderator, Rev. Dr. C. Chawngminglian Keynote Address sawiin Senior Executive Secretary, Rev. C. Zoramawia leh Mission Board Secretary, Rev. R. Lalhmingsanga ten Rawngbawltute fuihna thuchah an sawi bawk.

'Tunlai India rama rawngbawl dan tur pawimawhte' tih hmangin Paper zir ho a ni a, Resource Person chu Rev. Dr. Hmingthansanga, Director, Church Relation, Partnership and Networking, Interserve, India a ni. Pathianni chawhnu inkhawmah Missionary Chatuan ram pan ta, mi 21 sun an ni bawk.

Retreat-ah hian Central Region-a Mission Field 8 leh Partnership-a Missionary-te, Cambodia leh India ram lailia kan Missionary-te leh an chhungte mi 599 an kal thei a, Palai riaklut hi mi 514 awmin, langa kal mi 85 an awm a ni.

☐ Synod Bookroom Conference

Synod Bookroom chuan kum tina an lo tih thin angin May 25, 2023 (Ningani) khan Synod Bookroom Conference 2023 chu Synod Office Committee Room No. 2-ah an hmang a, Mizoram puma Synod Bookroom zawng zawng hei vang hian khar a ni.

Pu Lalniliana, Manager, Synod Bookroom chuan chawhma hun kaihruaiin inlawmna thu a sawi a. Pi Rosy Lalhmingmawii, Accountant-in Bookroom sum dinhmun report a pe a. Report atanga a lan danin kum kal ta khan Synod Bookroom hian nasa takin hma a sawn a. An budget ₹ 14,40,00,000/- chu tha taka khumin ₹ 21,97,27,814/- zet thawh chhuah a ni a, Synod Bookroom 1911-a din a nih atangin kum khata a thawh chhuah tam ber tum a la ni. Pathian awmpuina leh Kohhran mipuite thahnemngaihna azara hetiang dinhmun an thleng thei hi Synod Bookroom chuan lawmthu a sawi a ni. Chawhma hunah vek hian Upa H. Ronghaka, General Manager, PRESCOM chuan kum hmasa Bookroom Conference-a thurelte bawhzui a nih dan leh tihhlawhtlin a nih dan chi hrang hrang report a pe bawk.

Chawhnu hun chu Upa H. Ronghaka, General Manager-in kaihruaiin Mizoram puma Branch hrang hrangte atangin report leh rawnate ngaihthlak a ni a. Kum kaltaa Bookroom rawngbawlina hrang hrang thlirletna leh sawizauna neih a ni a. Pu Lalniliana Manager, Synod Bookroom-in Monthly Operation Review khaikhawmna a nei bawk.

Hemi hnu hian kum kaltaa Synod Bookroom Branch tha thlanna result puan niin Upa B. Lalhmunliana, Synod Secretary chuan Branch ti thate hnenah lawmman a sem a. Tehna ki hrang hrang palia inteh a nih hnuah hetiang hi kum 2022-23 chungga Synod Bookroom Branch tha lawmman dawngte chu an ni:-

Pakhatna : Synod Bookroom Chanmari Branch, Aizawl

Pahnihna : Synod Bookroom Churachanpur Branch, Manipur

Pathumna : Synod Bookroom Mamit Branch

Tun dinhmunah Synod Bookroom hian Branch 16 neiin Distribution Centre 48 a nei mek a ni.

☐ Kohhran Hmeichhia

◆ Kum 2023 Khawvel Pum Tawngtai rual Ni (World Day of Prayer) chu May 23, 2023 (Thawhlehi) zan khan hman a ni a. Kumina thuchah hi Taiwan rama hmeichhiate siam a ni.

World Day of Prayer pualin thawhlawm lak khawm a ni a, thawhlawm hi Bial Treasurer kal tlangin Kohhran Hmeichhe Department, Synod Office-ah chhun luh thin a ni a. Thawhlawm tling khawmte hi PWF Headquarters, Shillong-ah thawn thlak leh thin a ni.

◆ May 26-28, 2023 chung hian NEICCA Biennial Assembly, Lunglei Venglai Kohhran Biak Inah neih a ni dawn a, hemi hunah hian Central Committee member 16 leh Bial hrang hrang atangin member 38, an vaiin 54 an kal ang.

◆ May 27, 2023 (Inrinni) hian Aibawk Bialah Leadership Training neihpui turin Pi Zothanpari, Chairman leh Pi Lalrinawmi, Committee member te an kal ang.

□ **Pastor Retreat**

Presbyterian Church of India, Mizoram Synod hnuaiia Pastor Retreat chu May 23-26, 2023 chhung hian Aizawl Theological College, Durtlangah neih a ni. Retreat-ah hian Mizoram Synod hnuaiia thawk mek, Pastor leh Minister-te bakah Pensioner mi 497 an tel a ni. Retreat tan zan hian Synod Moderator Rev. Dr. C. Chawngminglianin inlawmna thu leh Keynote Address a sawi.

May 24, 2023 (Nilaini) zing dar 7:00-ah Sermon inkhawm neih a ni a, Rev. R. Lalrosiaman thuchah a sawi a. Chawhma session-ah 'Inpumkhatna awmzia leh pawimawhna' tih thupui chu Rev. Dr. C. Lalramchhanan a sawi a. Chawhnu session-ah 'Inpumkhatna - Mizoram Presbyterian Pastor-te mamawh' tih thupui chu Rev. Dr. H. Lalrinthangan a sawi a. Zanah 'Pastor-te leh Taksa hriselna vawn' tih thupui Rev. Dr. K. Lallawmzualan a sawi a ni.

May 25, 2023 (Ningani) zingkar Sermon inkhawmah Rev. V.L. Luaia Hranleh-in thuchah a sawi a. Chawhma session-ah 'Kohhran Chhungkaw Inpumkhatna tura Pastor mawhphurhna' tih thupui Rev. K. Rolungmuanan a sawi a. Chawhnu session-ah 'Pastor-te hriat atana thil pawimawhte' tih thupui Rev. Zothansangan a sawi a, zawhna leh chhanna (General Discussion) hun hman a ni bawk. Zanah inthlahna hun hman a ni ang a, Rev. C. Zoramawia, Senior Executive Secretary-in thuchah a sawi ang. Retreat hi Zirtawpni zing dar 8:00-ah a tiak ang.

Pastor Retreat hi kum 1967 atanga hman thin a ni a. Kum 1990 atangin kum khat kar danah neih a ni a. Pastor te tan intuaitharna hun pawimawh a nih avangin Pastor leh Pensioner ten an ngai pawimawh thin hle a ni.

□ **Lay Day**

May 26, 2023 (Zirtawpni) hian Synod Lay Workers' Fellowship Annual General Meeting, Synod Conference Centre, Mission Vengah neih a ni dawn a, Synod Office leh Department dangte pawh hemi ni hi chuan dawr theih an ni dawn lo a ni.

Lay Day hi hun hniha then a ni a, chawhma lamah Hun Urhsun hman a ni ang a, Upa H. Ronghaka, Chairman, SLWF-in a kaihrui ang a, Secretary leh Treasurer report ngaihthlak a ni ang. Rev. Dr. C. Chawngminglianin, Synod Moderator-in Lay Day Address a sawi ang a, Upa B. Lalmunlianin, Synod Secretary-in Souvenir a tlangzarh ang a, member pension-a chhuak mi 21 hnenah ngaihhruiina thilpek hlan a ni ang.

Chawhnu lamah Hun Hlimawm hman a ni ang a, Upa H. Lalnundanga, Synod Hospital-in a kaihrui ang a, variety programme hmangin hun hlimawm tak hman a ni ang a, tlaiah zanriah kil ho nghal a ni ang.

Synod Lay Workers' Fellowship (SLWF) hi Synod hnuaiia thawktu Aizawl-a awm, Pastor ni lo zawng te intelkhawmna a ni a, kum tin May thla Zirtawpni hnuhnung berah Lay Day an hmang thin a ni.

SLWF member-te hian Lay Day pual hian Synod Hospital, Durtlang tan Thisen unit 71 (mipa 51 leh hmeichhia 20) an pe a, tun dinhmunah SLWF member 806 an awm mek a ni.

□ **Synod Mission Board**

◆ **Jharkhand Mission Field**

May 20, 2023 (Inrinni) khan member thar panga an awm belh a, May 21, 2023 (Pathianni) khan member thar pakhat a awm belh bawk.

◆ **Consultation**

May 26-27, 2023 chhung hian MTC, Mission Vengthlangah Field Secretary leh Administrative Secretary-te tan Consultation neih a ni dawn..

□ **MSSU**

May 27, 2023 (Inrinni) hian Sunday School Zirtirtu Training neihpui turin Trainer-te hetiang hian an chhuak ang:

Zemabawk Vengthar Kohhran - Upa K. Zoremsanga, Trainer
Upa Lalsiammawia Pachuau, Trainer
T. Upa Dr. H.P. Lalropuia, Trainer
Dinthar Vengthlang Kohhran - Nl. Agnes Lalrinzuali, Asst. Coordinator
Upa Lalthanchhunga, Trainer
Upa Zionparlawma, Trainer

□ **Pentikos Ni**

May 28, 2023 (Pathianni) hi Pentikos Ni a ni a. Pentikos tih awmzia hi 'Sawmngana' tihna a ni. Thuthlung Hlui-ah chuan Kalhlen Kut tiak ni atanga ni sawmnganaah an hmang thin a, Thuthlung Thar hunah erawh chuan Isua Thawhle tuk (Easter) atanga ni 50-naah hman a ni.

Pentikos Ni hian hetiang hian thupui inang tlang zir ho a ni ang:

Chawhma Inkhawm:

Thupui : **Thlarau Thianghlim Nei rawh u**

Chhiar tur : Johana 16:12-15, 20:22-23

Chawhnu Inkhawm:

Thupui : **Kan mamawh - Thlarau dik tak**

Chhiar tur : Johana 16:13-15

Zan Inkhawm:

Thupui : **Tinungtu Thlarau Thianghlim**

Chhiar tur : Ezekiel 37:9-10, Johana 6:60-63

Zan inkhawmah PCI General Assembly puala tawngtai rualna hun atan hman thin a ni a, zan Inkhawm thawhlawm pawh PCI General Assembly pual tur a ni ang a, thawhlawm lak khawm te hi Bial Treasurer kal tlangin Synod Office-ah thehluh tur a ni.

□ **Synod Relief Fund**

Tun hnaia harsatna hrang hrang tawkte hnenah Synod Relief Fund atangin hetiang hian chhawmdawl na pek a ni.

S.No	Khua	Pek chhan	Chhungkaw zat	Pek zat
1.	Mamit Field Veng	In chhia	1	₹ 20,000/-
2.	Chawngtlai	Damlo	1	₹ 10,000/-
			Belh khawm	₹ 30,000/-

□ **Council of Churches kalphung tur pawm**

May 19, 2023 (Zirtawpni) khan Council of Churches in Mizorama tel Kohhran hrang hrang pasarih aiawhte chuan Booth Mansion Hall, Salvation Army Territorial Headquarters, Aizawl-ah Joint Meeting an nei a, palai 45 an kal khawm a ni. Synod Moderator, Rev. Dr. C. Chawngminglian a kaihruai a, BCM General Secretary, Rev. R. Lalbiaklian report pein, thut khawm hmasaa minute te, Kohhran hrang hrangte sawm an nih thu te, March 28, 2023-a BCM Headquarters Office, Serkawn Lunglei-ah Drafting Committee an thut khawm thu te tarlan a ni.

He Meeting-ah hian Drafting Committee-in Mizoram-a Church Council ruangam leh kalphung tur a lo duan lawk chu an thir ho va, siam that ngai laite siam that a nih hnuah mahni Kohhran rorelna sang berah putluh theuh ni se, an ti a. A thuphungin ruahmanna hi pawm a ni a mahse, thutlukna siam theitu an nih loh avangin mahni Kohhran theuh inkhawmpui lianah sawi leh ni se, an ti a. Inkhawmpui liana sawi ho hnuah nakkum March thla velah meeting neih leh tum ni se, an ti bawk.

January 24, 2023 khan Mizorama Kohhran panga - Presbyterian Church of India (PCI), Baptist Church of Mizoram (BCM), Evangelical Church of Maraland (ECM), Lairam Isua Krista Baptist Kohhran (LIKBK) leh Salvation Army te kalkhawm chuan 'Council of Churches in Mizoram' din hi an lo rel tawh a. March 28, 2023 khan BCM Meeting Hall, BCM Office, Lunglei-ah a ruangam tur duangtu, Drafting Committee an thu khawm a. Church Council ruangam (structure) hi an duang fel a ni.

Zirtawpni-a Council of Churches in Mizoram sawi honaah hian, IKK Bualpui (NG) bakah EFCI aiawhte an tel belh a ni.

□ **FM Zoawi - Aizawl & Lunglei : Hruaina Eng Radio Programme**

May 26, 2023 (Zirtawpni) @ 7:30 p.m. :

Fakhla huang

Solo : Felina Lalremruati - Chatuan lungpui

Zaipawl : Bawngkawn Bial Zaipawl - Ka tlinna Lalpa

Thusawi : Rev. K. Lalpiangthara - Lungawina kim

Solo : H. Lalmuankimi - Isuan ro a rel e

Zaipawl : Bawngkawn Bial Zaipawl - Hmangaihna tawp khawk

- ❑ **Susamachar Prasaran Programme :**
 May 28, 2023 (Pathianni) 5:30 pm. :
 Group/Choir/Solo : Khatla South Female Voice - Shukrya
 Group/Choir/Solo : Chanmari West - Yesu Mere
 Sermon : Rev. B. Zobiaktluanga
 Group/Choir/Solo : P.C. Lianhmingthanga - Sahara
 Group/Choir/Solo : Zotlang - Sara Zaha
- ❑ **Hruaina Eng TV Programme**
 25.5.2023 (Ningani) 8:30 pm : Zir bingna - Kohhran Chanchin (Tunlai hun)
 26.5.2023 (Zirtawpni) 5:00 pm : Kristian Naupang Pual
 27.5.2023 (Inrinni) 5:30 pm : Puitling Sunday School Zirlai
 8:30 pm : Rimawi huang
 28.5.2023 (Pathianni) 8:00 am : Weekly Round Up
 5:30 pm : Su Samachar
 29.5.2023 (Thawhtanni) 8:30 pm : Hruaina Eng Luang Chhuak
 30.5.2023 (Thawhlehi) 8:30 pm : Nilai Zan thupui zir ho - Synod Education Board leh
 Mizoram Christian College Governing Board
- ❑ **Moderator leh Executive Secretary-te Programme:**
Rev. Dr. C. Chawngmingliana : Moderator
 May 27-28, 2023 Teikhang Bial
 May 31, 2023 MTC - Mission Orientation programme leh Nupa Thu Sub-Committee
 June 3, 2023 Tlungvel Vengthar Kohhran Golden Jubilee hmanpui
Rev. C. Zorammawia : Senior Executive Secretary
 May 28, 2023 Rawpuichhip Centenary lawmna hmanpui
Rev. V.L. Luaia Hranleh : Executive Secretary
 May 29, 2023 Synod Rescue Home Committee
 May 31, 2023 SMTC Committee
 June 2, 2023 PRESCOM Enthatu, Child Evangelism leh
 SMTC training kharna a hmanpui
Rev. Dr. K. Lallawmzuala : Executive Secretary
 May 31-June 2, 2023 PCI Committee, Shillong
 June 2, 2023 MTC - Mission Orientation Training
 June 3-4, 2023 Saitual Bial KTP Half Year meet hmanpui
 May 30, 2023 (Thawhlehi)-ah OM leh June 1, 2023 (Ningani)-ah Synod Service Board-
 ah te Moderator leh Executive Secretary-te an thu ang.

DAWR RUAK LUAH THEIH CHUNGCHANG

Synod Compound, Mission Veng-ah Dawr MS-II C/11 leh C/29 a ruak a, luah duh chuan May 15-30, 2023 Synod Office hun chhungin thil zawrh tur ziak telin mahni Address leh Phone no. nen dil theih a ni a. He mi hun chhunga dil lo chu pawm a ni lo vang. Dilnaah Kohhran lehkha thil tel tur a ni e.

Sd/- Rev. C. Zorammawia
 Senior Executive Secretary
 i/c Synod Trust